



***Komunikadu Imprensa***  
***Parlamentu Nasional***  
**05 Jullu 2016**

**Deputadu Francisco Branco hosi Bankada Fretilin:  
Polítiku sira tenke sente moe bainhira la pontuál tanba funsionáriu públiku  
sira tama tuku 08:00 dader**

Iha reuniaun plenaria 04 Jullu 2016, asuntu pontualidade sai mós hanesan kestaun ne'ebé deputadu sira balun foti, inklui Prezidente Parlamentu Nasionál.

Kestaun ne'e hahú mosu, bainhira deputadu Virgilio Hornai, Prezidente Bankada PD krítika Meja Parlamentu Nasionál kona-ba jestaun tempu intervesaun diversu hosi deputadu sira. Deputadu Hornai dehan katak Meja preziza konsidera representasaun ne'ebé hanesan ba bankada parlamentár sira hodi halo intervensaun.

Prezidente Parlamentu hatan ba krítika ne'e hodi dehan katak Meja Parlamentu jere tempu ne'e ho representasaun ne'ebé hanesan entre bankada sira. Meja fó tempu ba deputadu na'in rua hosi bankada Fretilin, deputadu rua hosi bankada CNRT, deputadu ida hosi PD no ida hosi FM. Prezidente Parlamentu kontinua hodi hateten katak tempu ne'e la to'o tanba plenaria ne'e hahú tarde liu. Iha tuku 09:00 la iha kuorum no to'o tuku 10:30 mós sei nafatin la iha kuorum.

Relasiona ho asuntu pontualidade ne'e, deputadu Francisco Branco, hosi bankada Fretilin dehan katak polítiku sira tenke sente moe bainhira la pontuál, tanba funsionáriu públiku sira tama tuku 08:00 dader. Aleinde ne'e, deputadu Manuel Castro, bankada Fretilin mós husu atu plenaria ne'e tenke hahú 09:00, nune'e bele iha tempu natoon atu bele halo intervensaun no diskute asuntu importante sira.

“JSMP rekomenda ba deputadu sira atu hala'o sira nia knaar tuir Rejimentu Parlamentu Nasionál, nune'e bele hatudu imajen di'ak ba públiku, liu-liu bele hala'o servisu lejizlativu nian ho di'ak, efisiente no efetivu”, dehan Diretór Ezekutivu JSMP, Luis de Oliveira Sampaio.

JSMP nota katak mudansa pozitivu kona-ba pontualidade ne'ebé akontese iha inísiu mandatu Prezidente Parlamentu atuál fila fali hanesan uluk. JSMP mós observa katak deputadu sira la preokupa ho oras servisu, maske oras to'o ona no sinu tenke lian dala barak mak deputadu sira foin mosu. Mezmu tarde tiha ona, deputadu sira sei kontinua la'o sein preokupa kona-ba sira nia atrazu ne'e no kontinua la'o kalma (*santai*). Hahalok hanesan ne'e nu'udar toman ne'ebé la di'ak, ne'ebé fó impaktu maka'as ba produtividade Parlamentu Nasionál nian.

Atu hetan informasaun kle'an liu tan favor kontaktu:

Luis de Oliveira Sampaio  
Diretór Ezekutivu JSMP  
E-mail: [luis@jsmp.minihub.org](mailto:luis@jsmp.minihub.org)